



## 50 brojeva časopisa *Gračanički glasnik*

U Gračanici je nedavno promovisan 50. broj *Gračaničkog glasnika*, časopisa za kulturu i umjetnost. Pedeset brojeva ovog časopisa je za naše prilike vrijedno spomena, jer 25 godina redovno, dva puta godišnje, donosi različite tekstove koji se odnose na Gračanicu i njeno šire područje, a povremeno i na cijelu Bosnu i Hercegovinu. Od prvog broja postao je prepoznatljiv, kako po svojim raznovrsnim tematskim sadržajima koji se odnose na skoro sve značajne teme, od historije, privrede, prosvjete i kulture do sporta, tako i po tehničkoj opremi. *Gračanički glasnik* od svog pojavljivanja 1. novembra 1996. godine nije mijenjao sadržajnu koncepciju, odnosno tematske rubrike koje su zastupljene od samog početka njegovog izlaženja: *Povodom*, *Teme*, *Prošlost*, *Građa*, *Zavičaj*, *Riječ*, *Prikazi i osvrti*, *Listovi i Dodatak*. S vremenom je redakcija časopisa *Gračanički glasnik* uspjela okupiti brojne saradnike iz cijele Bosne i Hercegovine, a povremeno i iz inostranstva. Zbog svega navedenog, ovaj časopis se svrstao u našu solidnu periodiku pa nije samo gračanički nego i bosanskohercegovački.

Takav je i jubilarni pedeseti broj koji nas je obradovao brojnim zanimljivim tekstovima.

U rubrici *Povodom* su tri rada. U prvom, "Povodom 50. broja i 25 godina: *Gračanički glasnik* je zraka svjetlosti na gračaničkom nebu", prof. dr. Omer Ibrahimagić daje visoke ocjene i pohvale za dostignuća časopisa, a prof. dr. Azem Kožar u drugom prilogu "*Gračanički glasnik* – primjer jasne vizije i učinkovite misije njegovih pokretača i realizatora", između ostalog, ističe da je ovaj časopis kao otvorena knjiga o prošlosti i sadašnjosti Gračanice i okoline u svoj svojoj sadržajnosti i isprepletenosti s općim zbivanjima i procesima zadobio povjerenje intelektualne javnosti. U trećem prilogu iz ove rubrike "Zavičajnost ili regionalnost *Gračaničkog glasnika* – povodom 25 godina izlaženja" prof. dr. Izudin Kešetović razmatra ideju da ovaj časopis postane regionalni i da se odnosi na sve gradove u sjeveroistočnoj Bosni.

U rubrici *Teme* objavljena su dva priloga. Prvi je predavanje generala Fikreta Muslimovića održano u povodu 95 godina od rođenja Alije Izetbegovića u Sarajevu 5. juna 2020. godine: "Alija Izetbegović, vrhovni komandant Oružanih snaga Republike Bosne i Hercegovine", a drugi rad glavnog i odgovornog urednika i jednog od pokretača časopisa odnosi se na rezultate lokalnih izbora na području Grada Gračanica. U prilogu je i rang-lista vijećnika Gradskog vijeća prema broju dobivenih glasova.

U rubrici *Prošlost* objavljena su tri zanimljiva priloga. Prvi je "Šeh Dedino turbe u selu Čekanići" u kojem Edin Šaković donosi podatke o starom kulturnom mjestu u Čekanićima kod Srebrenika, dobro poznatom na širim prostorima sjeveroistočne Bosne. U drugom prilogu Marko Matolić se u povodu 50 godina od smrti katoličkog svećenika Ambrozija Benkovića

(1890–1970) osvrće na život i djelo ovog publiciste i kulturnog djelatnika koji se bavio historijom sjeveroistočne Bosne. U radu "Privredni razvoj Gračanice u periodu od 1995. do 2018. – kratak pregled" prof. dr. Omer Hamzić donosi historijsku retrospektivu privrednog razvoja općine / grada Gračanica u periodu od svršetka rata, 1995. godine, do najnovijeg vremena.

U rubrici *Građa* su tri priloga; prvi se odnosi na istraživački rad Ambrozija Benkovića, drugi na predstavku grupe gračaničkih trgovaca Zemaljskoj vladi Bosne i Hercegovine iz 1904. godine da se ukine robni vašar u Gračanici, a treći na arhivski fond: Vrhovni šerijatski sud Sarajevo (1879–1946) kao izvor za lokalnu historiju na primjeru Gračanice.

Rubrika *Likovi zavičaja* se odnosi na Ahmeda Zejnilagića, prvog nogometnog profesionalca iz Gračanice, a u rubrici *Zavičaj* su sljedeći radovi: "Zapis o starim vodenicama u Sokolu kod Gračanice" (Halil Hodžić) i "Hadžije s područja sela Džakule u periodu 1967. do 1920" (Fikret Ahmedbašić).

U rubrici *Riječ* objavljeno je pet kratkih priča Fatime Bećirević i osvrt na memoarsku prozu dr. Fadila Pitića.

Na kraju su prikazi i osvrti na šest knjiga i pregled dešavanja u Gračanici od 5. juna do 22. novembra 1920. godine. U redovnoj rubrici *Listovi gračaničkog kalendara* glavni urednik prof. dr. Omer Hamzić uredno bilježi sva dešavanja u ovom gradu i njegovoj okolini. Njegovi zapisi i osvrti su postali prava hronika Gračanice od oktobra 1996. godine do danas. Slike na koranicama i u tekstu su kopije slika autora Semira Osmanhodžića iz Gračanice.

Na kraju, napominjemo da je časopis *Gračanički glasnik* indeksiran u bibliografskoj bazi CEEOL.

Mina Kujović